

Otvaranje rekonstruirane zgrade Općine Livno 20. april 2011. godine



LIVNO, 20. april 2011. – Svečana ceremonija otvaranja rekonstruirane zgrade Općine Livno održana je 20. aprila 2011. godine, u prisustvu zvaničnika Općine, predstavnika GAP-a, mnogobrojnih predstavnika javnog života BiH, susjednih općina i građana Livna.

Ceremonijom je obilježen završetak jednog od zajedničkih projekata Općine Livno i projekta GAP. Načelnik Općine, gospodin Luka Čelan je, u svom govoru, spomenuo napretke koje je lokalna uprava Livna postigla u proteklih nekoliko godina, i zahvalio se na svesrdnoj podršci i suradnji osoblju projekta GAP.

Projekat “Rekonstrukcija zgrade Općine Livno – radovi na instalacijama” je odabran kao prioritet među projektima koji su predloženi za sufinansiranje u okviru GAP-a za 2010. godinu.

Zgrada Općine, koja je bila u veoma lošem stanju, izgrađena je za vrijeme austrougarske vladavine, a Općina je započela rekonstrukciju objekta nakon početka suradnje sa projektom GAP, kada se javila potreba za odgovarajućim prostorom u koji bi se mogao smjestiti Centar za pružanje usluga građanima i Centar za izdavanje dozvola u urbanizmu. Pomoć GAP-a, koja se odnosila na izgradnju instalacija u objektu je pomogla upravi Općine da završi cjelokupan proces rekonstrukcije objekta, čime su stvoreni uvjeti za rad osoblja Općine i efikasnije pružanje usluga građanima. Pored toga, osoblje sedam općinskih odjela, kao i ured načelnika i općinskog vijeća, koji su bili premješteni u druge objekte, su, nakon završetka radova vraćeni u renoviranu zgradu Općine.

Ukupni troškovi ovog dijela projekta rekonstrukcije su iznosili **633.334,47 KM**, od čega je GAP donirao **125.,000,00 KM**, ili 20%, a Općina učestvovala sa **508.334,47 KM**, ili 80%. Rekonstrukcija cijele zgrade općine, koja je trajala nekoliko godina, koštala je oko tri miliona KM.

O OPĆINI LIVNO

Općina Livno se nalazi u jugozapadnom dijelu Bosne i Hercegovine. Površina općine iznosi 994 km², a u općini živi oko 32,450 stanovnika. Livno je administrativni, privredni i kulturni centar Kantona 10, smješten u Livanjskom polju, najvećem polju u cijeloj BiH (oko 405 km²). Livno je prije rata bilo nerazvijena općina, čije su osnovne privredne aktivnosti bile proizvodnja tekstila i hemijska industrija, rudarstvo, poljoprivreda i trgovina. Nakon provođenja procesa privatizacije, mnoga poduzeća su zatvorena, dok ona koje još uvijek rade posjeduju značajno smanjene kapacitete.

Općina Livno je bogata prirodnim resursima koji se koriste za ekonomski razvoj. Najznačajnija oblast u sektoru proizvodnje je proizvodnja mlijeka i mliječnih proizvoda, kao i eksploatacija šume i rudnih bogatstava.

Općina Livno je postala partnerska općina GAP-a u februaru 2008. godine, a metodologiju planiranja kapitalnih investicija (CIP) primjenjuje od 2009. godine. Tokom prikupljanja prijedloga za projekte za period 2010. – 2014. godine (prvi CIP), općina je dobila 30 prijedloga projekata, od čega su 63% predložili uposlenici općinskih odjela, dok su 37% prijedloga podnijeli građani općine Livno, i predstavnici institucija i organizacija sa teritorija općine.

VIŠE O OPĆINI: <http://www.livno.ba/>

PRIJE...



Zgrada Općine Livno, juni 2010.

...I NAKON REKONSTRUKCIJE



Zgrada Općine Livno, mart 2011.